

## Codex Laureshamensis Teil: Bd. 1, Einleitung, Regesten, Chronik Nr. 55 (Reg. 3551)

In nomine sanctae et individuae trinitatis. Hludowicus divina favente providentia rex. Cunctorum orthodoxorum instantis temporis et futuri manifestetur collegio, qualiter reverendissimus dei cultor, augustensis videlicet honorabilis presul, nomine Adalbero, noster admodum fidelis nutritor, per interventum fidelium nostrorum, Chunradi scilicet comitis et Huoggi abbatis, serenitatis nostrae aeminentiam imploravit, deprecans, ut cuidam monasterii Lauresham cenobitae nomine Sigolfo, quasdam res iuris nostri, in pago Lobotingouue, in comitatu Liutfridi constitutas diebus vitae suae proprietario iure possidendas donaremus. Cuius itaque petitioni non inmerito gratuita mente annuentes, decrevimus ita fieri. Dedimus quidem prefato monacho sancti Nazarii Sigolfo, prout idem intentissimus nutritius noster petivit, in iam dicto pago vel comitatu, quicquid quidam homines Helmerich videlicet faber, et Engilbreht forestarius in locis Sunthoue et Scarra nuncupatis ex parte iuris nostri hactenus possidere visi sunt, cunctis vitae suae diebus more proprietatis quieto ordine fruendum, cum curtibus et casis aliisque edificiis, mancipiis, campis, agris, pratis, pascuis, silvis, aquis, aquarumve decursibus, molendinis, piscationibus, viis et inviis, exitibus et redditibus, quesitis vel inquesitis, terris cultis et incultis, mobilibus et immobilibus, universisque appenditiis et adiacentiis, illuc rite pertinentibus. Iussimus quoque hoc presens munificentiae nostrae conscriptum inde fieri, per quod omnino sancimus atque iubemus, quatinus memoratus Sigolfus easdem res integritate omni tempore vitae suae proprietatis iure habeat, teneat, atque possideat, absque alicuius impedimento. Post eius vero decessum, in ius monasterii cuius exstiterat monachus, pro comme moratione duorum parentum etiam nostrorum, animaeque nostrae eterna liberatione, in honorem sancti Nazarii salva integritate redigantur. Hoc autem ut verius credatur, diligentiusque conservetur per aevum, manu nostra subtus illud roborantes, anulo nostro iussimus insigniri. Signum domni Hludowici M. piissimi regis. Engilbero notarius ad vicem Diothmari archicapellani recognovi. Data IIII<sup>a</sup> kl. mai. Anno dominicae incarnationis DCCCC<sup>0</sup>. Indictione III<sup>a</sup>. Anno primo regni domni Hludowici regis. Actum Franconofurt curte regia. In dei nomine feliciter. Amen.